

金氏小兒直訣卷三

門人閻孝忠集

後學薛鎧校註

吐瀉兼變症治

五月二十五日巳後吐瀉壯熱此臟腑中九分  
熱也傷熱乳食吐而不消瀉色深黃玉露散主  
之○六月十五日巳後吐瀉身溫臟腑六分冷  
也嘔吐乳食不消瀉色黃白口乾作渴者食前  
少服益黃散食後多服玉露散○七月七日巳  
後吐瀉身涼三分熱七分冷也不乳多睡悶亂



家醫圖書  
小兒真訣卷三  
一  
哽氣出氣睡臥露睛唇白多噦亦用益黃玉露  
二散主之。○八月十五日已後吐瀉身冷不乳  
乾噦瀉青褐水無陽也當用益黃散吐瀉乳食  
不化時時下痢肌肉消瘦此脾胃虛寒也用木  
香丸夏月不可服如有冷症則少服之其身溫  
壯熱或瀉痢紅黃赤黑此脾胃實熱也用黃連  
丸冬月不可服如有熱症則少服之

薛按前法即內經用寒遠寒用熱遠熱之本  
旨又云有假者反之雖違其時以從其症蓋  
胃傷則嘔吐脾傷則泄瀉脾胃俱傷則吐瀉  
並作前症若傷辛熱停滯嘔吐或大便下痢  
者用六君子加黃連吳茱萸木香若停滯已  
去泄瀉不已用四君子加肉蔻骨脂若傷生  
冷腹痛瀉痢青白用六君子加砂仁木香炮  
薑若傷魚肉等物用六君子加山查砂仁若  
瀉紅黃赤黑諸臟皆熱也先用香連丸後用  
補中益氣湯送香連丸若瀉痢青白乳食不  
化者用人參理中丸若吐瀉昏睡而露睛者  
用五味異功散睡而不露睛者用玉露散若  
吐而手足俱熱或喜冷飲食或睡不露睛者



用瀉黃散或手足冷或惡冷飲食或睡而露  
睛者用六君子木香然木香黃連二丸雖能  
攻尅病邪不無傷損脾胃治者審之

五大尉患吐瀉米穀不化時六月或用溫補之  
藥更加嘔吐此熱傷胃也當用石膏湯解之不  
信又服丁香散師曰三日外必腹滿身熱飲水  
吐逆果如所言遂用白虎湯三服後以白餅子  
下之又與白虎石膏二湯各一服而愈

七大尉七月病吐瀉不食昏睡覺而悶亂噎氣  
乾嘔不渴衆作驚治師以爲脾虛先用史君子  
丸以補脾後用石膏湯以退熱次日以水銀硫  
黃末一字薑水調下間用溫補脾胃而愈

馮承務子五歲吐瀉壯熱不思飲食目睛多白  
面色無神師曰此腎經虛弱下之則愈虛遂以  
消積丸磨之漸愈大凡傷食不下則成癖下後  
即與補脾無不效者

愚治一小兒白睛多唇色白七月間停食吐  
瀉困睡驚悸久治不愈余曰驚悸心血虛怯  
也困睡脾氣虛弱也乃因稟賦不足所致耳  
用補中益氣湯及六味丸加鹿茸治之而愈



一 小兒盛暑吐瀉米穀不化或用黃連香薷  
飲之類腹脹作痛手足並冷此脾氣虛而伏  
陰在內也用五味異功散加木香治之而愈  
先君嘗云凡暑令吐瀉手足發熱作渴飲冷  
者屬陽症宜清涼之劑若手足並冷作渴飲  
湯者屬陰症宜溫補之劑故大人屬陰者誤  
用寒涼之藥死後手足青黯甚則遍身皆然  
於此可驗

若吐乳瀉黃傷熱乳也吐乳瀉青傷冷乳也皆  
當下之吐瀉昏倦睡不露睛者胃實熱也吐痰  
水者胃虛冷也

薛按前症若兒自受驚或乳母恚怒致兒吐  
瀉青色者宜用異功散加柴胡若母食厚味  
而乳熱者用東垣清胃散母飲酒而乳熱者  
用葛花解酲湯子服一二匙若飲燒酒而乳  
熱或子母身赤或昏憤服冷米醋三五杯多  
亦無妨兒服一二匙若母停滯生冷而乳冷  
者母服養胃湯子服調中丸若母停滯而變  
熱乳者母服大安丸子服五味異功散若母  
鬱怒傷肝脾而乳熱者用歸脾湯逍遙散若



母脾虛血弱而乳熱者用六君子加芎歸若  
母氣血虛而乳熱者子母俱服八珍散若母  
勞役發熱而乳熱者子母俱服補中益氣湯  
若因怒動肝火而乳熱者用五味異功散加  
柴胡山梔其吐痰涎及白綠水者肝木乘脾  
土之虛寒症也用六君子加柴胡木香大凡  
吐乳瀉青色者屬驚法當平肝補脾吐瀉青  
白色者屬寒法當溫補脾土前諸症若手足  
指熱者屬實手足指冷者屬虛此亦驗法也  
愚治一小兒每飲食失節或外驚所忤即吐

發搐服鎮驚化痰等藥而愈後發搐益甚  
飲食不進雖參朮之劑到口即嘔余用白朮  
和土炒黃用米泔煎數沸不時灌半匙仍嘔  
次日灌之微嘔再日灌之欲嘔此後每服二  
三匙漸加至半杯不嘔乃濃煎服而愈  
一小兒停食吐瀉後身熱作渴瀉下紅白或  
青黑服黃連丸之類將愈而復熱手足指却  
冷余謂始爲實熱終爲虛寒用補中益氣湯  
加木香肉果治之而愈  
一小兒傷食吐瀉不已瀉色青綠或澹白睡



而露睛手足指冷額黑唇青余謂瀉痢青綠  
肝勝脾土也或時澹白脾土虛寒也額黑唇  
青寒水侮土也悉屬中氣虛寒用五味異功  
散加升麻柴胡木香附子一劑而愈

一小兒傷食嘔吐發熱面赤服消導之劑飲  
食已消熱赤未退余以爲胃經虛熱用六君  
子加升麻柴胡各二分四劑而愈

一小兒目睛緩視大便臭穢乃飲交感時乳  
所致用四君子加木香藿香治之而安

一小兒吐酸乳食用四君吳茱萸黃連木香補  
脾平肝而愈後口中有酸水仍用前藥隨愈  
後唾苦水口中味苦用龍胆湯清肝火佐以  
四君子以補脾土乃瘥

一小兒唾黃水或口甘所食之物悉皆甘味  
用瀉黃散愈後停乳食服剋伐之藥口甘不  
食形氣殊弱用補中益氣湯而愈

初生十日內吐瀉壯熱不乳或乳不消或白色  
先用白餅子下之後用益黃散和之

初生下吐因穢惡下咽故也用木瓜散主之凡  
初生急須拭淨口中否則啼聲一發穢物嚥下



家醫醫書  
小兒直訣卷一  
六  
致生諸病

薛按芽兒初生之患多因乳母不慎七情不節厚味傳兒爲病當審其因以調治其母前所用之藥恐臟腑脆嫩不能勝受治者審之

咳嗽兼變症治

附喘嗽治驗

夫嗽者肺感微寒之症也八九月間肺氣大旺咳嗽面赤痰盛身熱當以葶藶丸下之若久病不可下也○十一月十二月嗽者乃傷風嗽也風從背脊第三椎肺俞穴而入當以麻黃湯汗之有熱症面赤飲水咽喉不利者兼用甘桔湯

治之○若五七月間身熱甚唾粘者以福銀丸下之若無熱症而但嗽者以葶藶丸主之後用化痰藥○咳而後喘面腫者肺火盛也用瀉白散瀉之○咳而哽氣喉中有聲或嗽久肺亡津液者皆肺虛也並用阿膠散補之痰盛者先實脾土後用福銀丸微下涎退即補肺○嗽而吐青綠水者百祥丸下之嗽而吐痰涎乳食者白餅子下之嗽而咯膿血者甘桔湯主之嗽而痰實面赤飲水者福銀丸下之治初嗽下之久則補之更量虛實以意增損



薛按前症或兒自因腠理不密外邪內蘊或因乳母七情厚味鬱熱若風邪外傷者用麻芩芎藭散鬱熱內蘊者用葶藶丸疏導鼻流涕或頭痛聲重者用參蘇飲散之更用四君子以固肺氣若心火刑肺用人參平肺散清肺金用六味地黄丸以滋腎水若嗽而青綠水者用六君子加柴胡桔梗平肝補若嗽而吐痰乳者用六君子加桔梗補土工金若嗽而吐膿血者用桔梗湯排膿理肺潔古先生云嗽而兩脇痛肝火侮肺也用小

柴胡湯嗽而嘔苦水膽汁溢上也用黃芩半夏生薑湯嗽而喉中作梗心火刑金也用甘桔湯嗽而下氣小腸失約也用芍藥甘草湯嗽而喘急風邪傷肺也用麻黃湯嗽而嘔長蟲胃氣虛也用烏梅丸嗽而痰涎壅盛風傷脾也用升麻湯嗽而遺尿大腸氣虛也用赤石脂禹餘糧湯不止猪苓湯嗽而腰背痛痛甚則咳涎風邪傷腎也用麻黃附子細辛湯嗽而遺尿膀胱氣虛也用茯苓甘草湯嗽而腹滿面腫不食脾虛氣逆也用五味異功散



丹溪先生云上半日嗽者胃中有火也黃昏  
嗽者脾肺氣虛也午後嗽者腎中陰火也大  
抵咳嗽之症多因肺氣虛腠理不密外邪所  
乘若風中於衛則呼氣不出熱至於榮則吸  
氣不入風熱相搏血氣稽留於肺若寸口脉  
數而虛爲肺痿脉數而實爲肺疽此因汗下  
過度重亡津液所致其麻黃湯乃發汗解表  
之劑葶藶丸乃內踈通利之劑白餅子亦踈  
利之劑審有是症方可暫用之苟泛投施治  
重亡津液必致敗症

杜氏子五歲仲冬咳嗽吐痰此風寒傷肺也用  
麻黃丸以瀉肺後用阿膠散以實肺如此者三  
其病愈虛師曰瀉肝而肝病不退補肺而肺病  
猶存無能爲矣果大喘而歿

李運使孫八歲咳嗽胸滿短氣或謂肺經有熱  
用竹葉湯牛黃膏各二服三日加喘師曰此肺  
氣虛而寒邪所乘用補脾肺之藥而愈蓋竹葉  
牛黃治心藥也用以治肺誤矣

張氏孫九歲喘嗽悶亂飲水不止食不能下或  
用涼藥月許無效師曰此涼藥寒胃也以益胃



散補脾土以瀉白散瀉肺金而愈

段齋郎子四歲病嗽身熱吐痰數日咯血或用  
甘桔湯防已丸其涎上攻吐喘不止用福銀丸  
一服下之復以補肺散治之或曰症屬肺虛何  
以下師曰肺經咯血而有熱故也况痰實上攻  
亦使發搐故宜先下其痰隨補脾肺而愈

愚治一小兒停食服剋伐之藥唾痰腥氣面  
赤氣喘此復傷肺氣內亡津液而變肺癰也  
不信已而果唾膿用桔梗湯痰膿頓止其喘  
益甚余謂因脾虛不能生肺而然也用五味

異功散加杏仁薏苡仁百合治之而愈後小  
便澁滯誤服八正散二劑小便愈澁咳嗽唾  
痰面赤盜汗此前藥復損腎氣虛火爍肺而  
爲患耳余用五味異功散調補脾土用地黃  
丸滋養腎水而痊

愚治一小兒感冒咳嗽發散過度喘促不食  
痰中有血用桔梗湯愈後因元氣未復大便  
似痢或用五苓散黃連枳實之類痰喘目劄  
四肢抽搐變慢脾風而歿

一小兒傷風咳嗽發熱服解表之劑加喘促



出汗余以爲脾肺氣虛欲用補中益氣湯加五味子補之不信乃服二陳桑杏枳殼桔梗前症益甚又加發搐痰湧余仍用前藥更加釣藤鈎而痊

一小兒母有哮病因勞即發兒飲其乳亦嗽用六君子加桔梗桑杏治其母子常服數滴而愈大凡乳下嬰兒有疾必調治其母爲善一小兒傷食發熱抽搐嘔吐氣喘痰嗽屬脾肺氣虛而有熱以六君子加炒黑黃連山梔各二分一劑頓安

一小兒咳嗽因其母素食膏粱炙博所致用東垣清胃散而愈後其母因怒咳嗽脇痛其子亦然母服小柴胡湯其子亦愈

一小兒傷風咳嗽或行表散化痰反加痰盛肚腹膨脹面色眊白余謂此因脾肺氣虛而復傷用六君子加桔梗一劑頓愈三日後仍嗽鼻流清涕此復傷風寒而作仍用前藥加桑皮杏仁而愈

一小兒咳嗽痰涎上湧服清氣化痰藥反五更痰嗽余以爲脾虛食積爲痰也用六君子



加神麴山查桔梗而愈若因痰積而咳嗽者  
但健脾消食其痰自化若用剋滯之劑中氣  
愈虛其痰愈盛

一小兒喘嗽胸腹膨脹泄瀉不食此因飲食  
傷脾而不能生肺也用六君子湯一劑而愈  
一小兒痰涎上湧則咳嗽面色黃白服清肺  
之藥不應服下痰之藥益甚余曰面色痿黃  
乃脾虛不能化食而爲痰也令節飲食用六  
君子湯而痊大抵因嗽而生痰者當治其肺  
因痰而致嗽者當理其脾

卷二終

錢氏小兒直訣卷三

門人閻孝忠集  
後學薛鎧校註

五臟內外疳症主治

凡小兒疳在內目腫腹脹瀉痢青白體漸瘦弱  
疳在外鼻下赤爛頻揉鼻耳或肢體生瘡鼻瘡  
用藷香散諸瘡用白粉散 肝疳一名筋疳白  
膜遮睛或瀉血而瘦用地黃丸 心疳面黃頰  
赤身體壯熱用安神丸 脾疳一名肥疳體黃  
瘦削皮膚乾澁而有瘡疥腹大嗜土用益黃散



腎疔一名骨疔肢體瘦削遍生瘡疥喜臥濕地  
用地黃丸 肺疔一名氣疔喘嗽氣促口鼻生  
瘡用益黃散 若患潮熱當先補肝後瀉心若  
妄以硝黃諸藥利之若患癰當消磨若誤以巴  
豆礪砂下之又傷寒悞下皆能成疔其初病者  
爲熱疔用黃連丸久病者爲冷疔用木香丸冷  
熱相兼者用如聖丸津液短少者用白朮散凡  
此因大病脾胃虧損內亡津液所致當固脾胃  
爲主而早爲施治則不變敗症也

薛按疔症或哺食太早或嗜食甘肥或服峻

厲之藥重亡津液虛火熾盛或因稟賦或乳  
母厚味七情致之當各調治其內○若口舌  
蝕爛身體壯熱顛唇赤色或作腫痛腹膈煩  
悶或掌熱咽乾作渴飲水便赤盜汗嚙齒虛  
驚此心經內外疔也用安神丸之類主之○  
若鼻外生瘡眼目赤爛肢體似癰兩耳前後  
項側缺盆兩腋結核或小腹內股玉莖陰囊  
辜丸腫潰小便不調或出白津或咬指甲搖  
頭側目白膜遮睛羞明畏日肚大青筋口乾  
下血此肝經內外疔也用地黃蘆薈二丸主



之○若頭不生髮或生瘡痂或髮成穗或人中口吻赤爛腹痛吐逆乳食不化口乾嗜土瀉下酸臭小便白濁或合目昏睡惡聞木音此脾經內外疳也用肥兒丸主之○若鼻外生瘡咽喉不利頸腫齒痛咳嗽寒熱皮膚皺錯欠伸少氣鼻痒出涕衄血目黃小便頻數此肝經內外疳也用地黃清肺飲主之○若腦熱吐痰手足逆冷寒熱往來滑泄肚痛口臭作渴齒齲潰爛爪黑面黧身耳生瘡或耳出水或食自髮此腎經內外疳也用地黃丸

主之凡疳熱上攻或痘毒上升為患甚速名為走馬疳急敷雄黃散服蟾蜍丸輕則牙齦腐爛唇吻腫痛可治重則牙齦蝕落腮頰透

爛不治

世傳方又云有無辜等疳一十二症補註蟾蜍丸下

愚治陳職方孫面頰患瘡將蝕兩目或用清熱之藥久而不愈余用大蕪荑湯二劑清其肝火而愈

陳司廳子遍身生瘡面色痿黃腹脹內熱大便不調飲食少思倦怠口乾用大蘆薈丸治其肝脾不月而愈



俞廷評子目劓面青食少體倦大便滑泄此木乘脾土用芍藥參苓飲而痊

陳工部孫腹內一塊小便不調或以血痞久服行氣破血等藥發熱口乾體瘦懶食幾成瘵症余謂面黃兼青乃肝脾疴症用補中益氣湯煎送太蘆薈丸四服又用前湯加車前子煎送六味丸四服又用清肝生血之藥而愈

一女子十二歲目生白翳面黃浮腫口乾便澁此肝脾之症用四味肥兒丸而痊

一小兒九歲目劓畏明年深不愈或以為實火服瀉青丸之類益甚求治於余仍欲瀉肝余謂肝經虛火用地黃丸補之而愈夫肝氣為陽為火肝血為陰為水肝經之症若非肝火血燥而生風必因肝血虛而火動其初患而病氣形氣俱實者宜少與瀉青丸瀉之其久患而病氣形氣俱虛者當與地黃丸補其腎肝蓋此症原因肝經血少而生風耳不可輒用瀉青峻劑經云凡病虛則補其母實則瀉其子前症果肝經實熱宜用柴胡黃連之



類以治心火者審焉

一 小兒鼻外生瘡不時揉擦延及兩耳又一  
小兒視物不明鼻內或痒或生瘡用四味肥  
兒丸漸愈

一 小兒耳內出水耳外生瘡膿水淋漓經歲  
不愈余用九味蘆薈丸以治肝用地黃丸以  
生腎水乃瘥

一 小兒遍身如瘡或痒或痛肌體消瘦日夜  
發熱口乾作渴大便不調年餘不愈用蘆薈  
丸以治肝兼五味異功散以補脾而愈

一 小兒數歲腦後並結二核肉色如故而平  
骨腫正屬膀胱經觀其形狀審其糞色兼屬  
肝脾腎三經用九味蘆薈丸以清肝脾佐用  
地黃丸以補腎水形體漸健不兩月而消  
一 小兒腹內結塊小便不調余以為肝經內  
疝症用蘆薈丸為主佐以龍膽瀉肝湯而消  
一 小兒自脫胎即兩目赤腫或作痒或作翳  
此胎稟肝火耳用六味蘆薈二丸而愈  
一 小兒患癩癧小便頻數兩目連劄或作嘔  
少食泄瀉後重此肝經熱盛而脾土受邪也



用補中益氣湯六味地黃丸而痊

一小兒面色痿黃眼胞微腫作渴腹脹飲食少思腹中一塊或移動小便澄白大便不實此脾疳之患用四君子加山梔蕪荑兼四味肥兒丸而愈

一小兒嗜食泥土困睡泄瀉遍身如疥此脾經內外疳也用六君子湯及四味肥兒丸而痊

一小兒面黃頰赤發熱作渴睡中驚悸此心經內疳症用四君加炒黑黃連芎歸爲主佐

以秘旨安神丸而痊

一小兒所患同前兼掌心發熱遍身如疥此心經內外疳症用肥兒丸爲主佐以秘旨安神丸而愈

一小兒咳嗽寒熱咽喉不利鼻上有瘡久不生痂此脾經疳症用地黃清肺飲四味肥兒丸而愈

一小兒下疳潰爛爪黑面鰲遍身生疥此腎經內外疳症用地黃丸爲主佐以四味肥兒丸而痊



史少參幼子二歲項後結核不時仰首或以  
爲熱瘡內潰用針決之服消毒之藥後曲腰  
啼哭余謂此無辜外疔症也曲腰而啼內疔  
症也果歿

腹痛腫脹諸症

小兒腹痛體瘦面色眊白目無睛光口中氣冷  
不思飲食或嘔利撮口此脾土虛而寒水所侮  
也用益黃散調中丸主之若口中氣溫面色黃  
白目無睛光或多睡惡食或大便酸臭此積痛  
也用消積丸甚者白餅子下之後以白朮散調

補胃氣若腹脹而悶亂喘滿者實也用紫霜丸  
白餅子若不悶亂喘滿者脾虛也誤下之以致  
目胞腮面四肢浮腫肚腹愈脹以塌氣丸主之  
因下而喘脾氣益虛也脾虛不能勝腎水隨肺  
氣行於四肢如水狀若侵浮於肺即大喘也  
薛按腹痛不食口中氣冷下利撮口等症屬  
形病虛寒也用六君子加炮薑溫補之食積  
多睡口中氣溫惡食面黃白等症屬病氣實  
而元氣虛也用六君子加神麴山查消導之  
劑若腹脹喘滿脾肺虛而氣不歸源者用補



中益氣湯若因下脾肺氣虛而面目四肢浮腫等症者用金匱加減腎氣丸况此症有因乳母脾胃宿積飲食傷脾所致其白餅子紫霜丸必形病俱實方可用也塌氣丸亦非調補之劑宜審用之

愚治一小兒每停食腹痛發赤暈用清中解鬱湯而愈後患搖頭咬牙痰盛發搐吐酸腐待其吐盡翌日少以七味白朮散次日又以參苓白朮散調理脾胃遂不復患大抵吐後兒安不必更服他藥恐復傷元氣也

一小兒傷食腹脹嘔吐發熱面赤服消導清熱之劑飲食已消熱赤未退用六君子加升麻柴胡各二分升補胃氣四劑而愈

一小兒五歲停食腹痛發熱面赤或用養胃湯枳實黃連更加腹脹午後熱甚按其腹不痛余以爲脾虛而藥傷用六君子湯數劑而痊

一小兒數歲每停食輒服峻厲之藥後肚腹膨脹嘔吐泄瀉先用六君子湯諸症漸愈又用補中益氣湯而安



一小兒肚腹脹飲食即瀉手足逆冷此脾氣虛寒也先用人參理中丸後用六君子湯而愈

一小兒傷食腹脹胸滿有痰用異功散而痊後復傷食腹脹兼痛或用下劑痛雖止而脹益甚更加氣喘此脾益傷而肺益虛也用六君子湯加桔梗調補而愈

一小兒腹脹惡食發熱惡心殊類外感余曰此飲食所傷脾肺虛熱也用保和丸一服諸症頓退但腹仍脹用異功散而痊

一小兒傷食腹脹服剋伐之劑小便澇滯又服五苓散之類飲食漸減小便不通四肢頓腫余朝用金匱加減腎氣丸夕用異功散而愈

若腎熱傳於膀胱熱甚逆於脾肺脾胃虛而不能制腎水流走四肢而身面皆腫若上勝則刑於肺故令喘也

薛按肺主氣腎主水前症因稟賦不足或因大病後或悞行汗下致脾虛不能制水而溢皮膚肺虛不能攝氣而氣上逆宜用六味丸



補中益氣湯治之如小便不利用金匱加減  
腎氣丸腎經虛火上炎肺熱作喘者用六味  
地黃丸心火熾盛肺熱作喘者用人參平肺  
散凡此皆屬腎經陰虛熱症用六味丸壯水  
爲主若用清熱分利之藥則誤矣

一小兒稟父腎熱小便赤澀服五苓散之類  
後患停食服尅伐之藥四肢面目浮腫小便  
不利漸至氣喘此誤行滲利脾肺氣虛不能  
攝水而患腫脾腎虛寒不能制水而氣喘用  
六味丸加牛膝車前及補中益氣湯而愈

若口吐痰沫或吐清水面皸白心腹痛而有時  
者蟲痛也與癩相似但目不斜手不搐也用安  
蟲散主之

薛按蟲乃濕熱所生或木氣而化有因臟腑  
虛弱有因胃冷胃熱爲人身之固有者其爲  
患往來攻痛或吐涎水肌體消瘦面無正色  
但當調補脾胃爲主若蟲食上部則上唇有  
白點蟲食下部則下唇有白點腹中之蟲朝  
日之後其頭向上望日之後其頭向下如或  
用藥先以肉物近兒烹炙使聞香味蟲頭皆



向上則藥易於奏效丹溪先生云冬月吐蟲多是胃氣虛寒用錢氏白朮散加丁香二粒補之可見小兒之蟲皆飲食傷脾所致患瘡疥内生蟲虱者皆肝木所主也

辛氏子年五歲病蟲痛或用巴豆礪砂之類哭而俛仰按腹大叫面青黃而時白目仍青師曰此病大困更加瀉則不救次夜大瀉并下前藥師曰今面青作瀉此肝木乘脾形病相反當五日篤七日死已而果然

愚治一小兒蟲動心腹痛先服蕪荑散下之更加作嘔食少口渴飲湯右顛鼻準白中兼黃此脾肺氣虛也余用異功散二服少愈仍加炮薑一服而安

一女子年十三歲面色青黃頭左生瘰頸項結核寒熱往來大便不利余謂此肝木侮脾元氣虧損所致寒熱非客邪便秘非內實不信仍服雜藥後作泄瀉瘰內出虱余用六君子加升麻柴胡蕪荑爲主佐以九味蘆薈丸諸症悉退頸核頓消

一小兒面色青黃心腹作痛時欲嘔吐或小



便淋漓或陰莖濕痒余以爲肝經風熱侮脾不信後遍身生疥出蟲虱余用四味肥兒丸六君子湯之類尋愈

若腹中有癖不食但飲乳是也當漸用白餅子下之蓋小兒病此良由乳食不消伏於腹中乍冷乍熱飲水過多即蕩滌腸胃亡失津液脾胃虛弱不能傳化水穀以致四肢羸瘦肚腹漸大而成疳矣

薛按前症或因小兒乳食過多致傷脾胃或乳食起居七情六淫失宜所致必先調補元氣爲主佐以消散之劑若除之不以漸則必有顛覆之患常治食積旣去而熱不退或作嘔吐少食用五味異功散脇脹少食善怒瀉青用六君子湯加升麻柴胡少食體倦瀉黃用補中益氣湯手足冷加炮薑木香如不應佐用四神丸體瘦潮熱口乾大便不調用肥兒丸若兼頸項結核口齒腐爛當參前疳條主之

愚治一小兒腹中痞塞恪服二陳枳實黃連其痞益甚余謂屬脾經血虛用六君子加當



歸數劑胃氣漸服復乃朝用異功散加升麻  
夕用異功散加當歸而愈

一小兒素嗜肉食腹中作痛大便不調半載  
之後肚腹膨脹右脇內結一塊不時轉移又  
三月左脇內亦結一塊胸腹亦脹齧潰作渴  
小便赤濇或澄白大便色穢不一又半載頷  
下結核三五枚服消塊行滯等藥元氣益虛  
其塊益甚余用四味肥兒丸五味異功散之  
類隨症進退治之熱渴漸止又月餘腹脹漸  
消更佐以九味蘆薈丸齒齲漸愈乃用四君

子為主佐以蕪荑丸之類而痊

一小兒飲食不節或作瀉或腹痛或腹脹腹  
中一塊大便不調作渴發熱齲爛口臭專服  
消導尅滯前症益甚形體益瘦余曰面色黃  
中隱青脾土虧損而肝木所侮也法當調補  
中氣平肝木則脾氣自旺虛火自退諸症自  
愈遂用冲和湯及大蕪荑湯之類果愈

一小兒患痞服尅滯之藥余謂形氣有餘病  
氣有餘者當瀉不當補形氣不足病氣不足  
者當補不當瀉前症屬形病俱虛非調補中



氣不愈不信仍行尅伐元氣虧損虛火上炎  
齒齲蝕爛頷下結核余用大蕪荑湯及異功  
散之類尋愈

五臟雜症主治

喜汗者厚衣臥而額汗出也盜汗者肌肉虛而  
睡中汗出也用止汗散遍身汗用香瓜丸○胃  
虛汗者上至項下至臍也用益黃散六陽虛汗  
者上至頭下至項難治

薛按前症因小兒元氣未充腠理不密或因  
飲食停滯鬱熱或厚衣溫煖臟腑生熱而津

液妄泄也其喜汗屬心經血熱用導赤散血  
虛用團參湯其盜汗屬腎經虛熱用五味異  
功散氣血虛弱用人參養榮湯若寒水侮土  
用益黃散設泛行施治誤損脾胃多成疔瘰  
其六陽虛汗乃稟賦不足若用參附芪附二  
湯亦有生者大凡汗多亡陽必至角弓反張  
頸項勁強若用十全大補之劑多有生者  
張氏三子大者汗出遍身與香瓜丸次者上至  
項下至胸與益脾散小者但額有汗與石膏湯  
各五日而愈若槩用麥煎散治之誤矣



愚治一小兒其面色或白或青或惡寒或發熱鼻間微黃兼白盜汗自汗胸膈不利飲食少思常懷畏懼余以爲脾肺氣虛不信又用硃砂安神之類前症益甚更往來寒熱泄瀉不食余用六君子湯加黃芪當歸爲主佐以八珍湯之類而痊

一小兒五歲腹痛泄瀉盜汗鼻間左顙皆白此屬脾肺氣虛而食積所致用六君子加山查神麩四劑腹痛頓止去二味又四劑而大便調用四君歸芪二劑而盜汗止

一小兒十二歲形氣瘦弱右顙白兩頰赤鼻間隱青盜汗久不愈此稟足三陰虛而然也朝用補中益氣湯夕用六味丸而愈

一小兒三歲盜汗少食聞藥即嘔此胃傷也用浮麥炒爲末每服少許以乳調服旬餘嘔止乳進佐以六君子湯而愈

一小兒停食腹痛夜間盜汗此脾虛食積所致用六君子湯數劑腹痛漸愈盜汗亦止後復停食服消積丸作瀉不止自汗盜汗飲食甚少睡而露睛四肢發搐此脾土虛而肝木



所勝用六君子少加柴胡治之飲食漸進諸症漸愈但盜汗不止屬腎虛也佐以地黃丸愈

一小兒發熱呵欠頓悶咬牙盜汗屬肝膽火症用小柴胡湯加山梔二劑又前用地黃丸料煎服而愈

夜啼者小兒筋骨血脈未成而多哭脾臟冷而痛也當與溫中藥或花火膏主之 若虛怯爲冷所乘則唇青

薛按前症多因小兒稟賦不足或乳母飲食

七情虧損所致若面色白及白睛多者屬腎氣不足至夜則陰盛而腹痛也用六味丸若臉青唇白或小便黃短屬脾氣不足至夜則陰盛而腹痛也用釣藤散若臉紅舌白或小便赤濇小腸熱也用導赤散加辰砂如不應屬腎火用地黃丸唇色青白口中氣冷或肢體冷或泄瀉曲腰或泄瀉不乳此脾腎虛弱用六神散兼嘔吐用六君子湯大便不化乳少腹脹用五味異功散加漏蘆令母服之兒病自愈兒亦服四五滴尤妙兒大數滴



愚治一小兒停食腹痛夜啼用大安丸而愈  
後乳食雖入其腹仍痛用六君子加山查神  
麩痛少止乃去二味又四劑痛全止  
一周歲兒痰嗽啼哭或用抱龍丸未止余視  
其右顛白左顛青此肺肝二經相勝先用瀉  
白散以祛肺邪次用柴胡梔子散以平肝火  
又用地黃丸以滋腎水而痊  
一小兒三歲夜啼面色白黑睛少小便清此  
脾腎氣虛朝用補中益氣湯加山藥五味子  
夕用地黃丸頓愈

驚啼者邪氣乘心也當以安神主之

愚按哭而不啼多泪是驚悸也啼而無泪是  
痛也若因心血不足用秘旨安神丸心火熾  
盛用導赤散木火相搏用柴胡梔子散肝血  
不足用六味丸所云十啼者蓋亦大同小異  
耳

愚治一小兒白睛多面色赤時作啼此稟腎  
不足用地黃丸半載後忤其意雖哭面色不  
赤丹溪先生云小兒忽大叫必死即此義也  
若浴後拭臍不乾風入作瘡令兒撮口甚者是



脾虛也若頻撮口是氣不和也益黃散主之

愚按前症果因浴後拭挹不乾用枯礬爲末  
搽之即愈若兼乳母肝脾有熱助兒爲患當  
用加味道遙散以治其母若風入作瘡邪傳  
於脾撮口者其害匪輕七日內患者其危尤  
速

弄熱舌者脾臟微熱令舌絡牽緊時時舒熱當  
少用瀉黃散或飲水者脾胃虛而津液少也兼  
面黃肌瘦五心煩熱者疳瘦也用胡黃連丸大  
病未已而弄舌者凶

按小兒舌微露而即收名弄舌屬心脾虧  
損用溫脾散補之舌舒長而收緩名吐舌乃  
心脾積熱少用瀉黃散主之兼口舌生瘡作  
渴飲冷屬胃經實熱用瀉黃散作渴畏冷屬  
胃經虛熱用四君子湯食少作渴或大便不  
實脾胃虛弱也用七味白朮散口角流涎或  
顛頰患腫胃虛風熱也先用人參安胃散後  
用七味白朮散若午後甚者脾血虛也四物  
湯多加參朮茯苓未應用補中益氣湯及審  
相勝其疳瘦症當參諸疳門

七味白朮散即  
人參白朮散



解顱者生下顱門不合也長必多愁少笑目白睛多面色眊白肢體消瘦皆腎虛也

愚按腎主髓腦爲髓之海前症因父母精血不足不能榮養宜用地黃丸補之有至七八歲或十四五歲氣血旣盛而自合若縱恣食色慾戕賊真陰亦不能盡其壽矣此症若在乳下當兼補其母更以軟帛緊束兒首使其易合亦有顱陷顱填俱屬稟不足或五疳久病元氣虧損者仍參後小便不通類主之愚治一小兒顱解足軟膝大不能行履用六

味丸加鹿茸治之三月而能步履

一小兒年十四歲而近女色發熱吐痰至有室兩目羞明頭覺脹大仍不斷慾頭漸大顱門忽開用地黃丸益氣湯之類斷色慾年餘而愈

一小兒十三歲患前症內熱晡熱形體倦怠食少作渴余以爲所稟怯弱用六味丸加鹿茸補之不越月而痊

一小兒十四歲解顱自覺頭大視物皆大畏日羞明先兄以爲腎稟怯弱用六味丸加五



味鹿茸及補中益氣加山藥山茱萸半載漸愈二載而顙合後婢姻覺顙門開解足心如炙喜其斷色慾戒厚味日服前藥二劑三載而愈

胎肥者生下豐厚自睛粉紅大便乾難時出涎水○胎熱者生下血色時叫哭身熱淡黃目睛多赤大便色黃急欲食乳並用浴體法主之○胎怯者生下面白肌肉瘦弱大便白水身無血色哽氣多噦亦用浴體法

薛按浴體之法乃開發腠理疎泄陽氣者也

其胎氣果熱在暑月庶幾可用其或胎怯而用前法恐復傷真氣也然此症屬有餘者胎肥胎熱也因母食膏粱厚味或怒火鬱熱胎怯弱者因父精不足或母氣虛弱用八珍湯父精不足用地黃丸俱加漏蘆令母服之子亦服之

急欲乳不能食者此風邪由臍而蘊熱心脾致舌厚唇燥不能吮乳也

薛按前症果因外邪而唇口撮緊者名爲臍風多不能救若心脾有熱舌尖痛不能吮乳



舌本痛不能送乳者以柳華散敷之若舌下  
 腫如小舌者或舌絡牽痛或齒齦患白星俱  
 用線針刺出毒血亦敷前散若唇腫痛或裂  
 紋作痛以當歸膏調前散敷之若暴病發熱  
 作渴飲冷大便秘結用瀉黃散疎導其熱若  
 病後發熱口渴飲湯大便不實用異功散調  
 補胃氣若服攻伐之劑兼嘔吐或腹痛脾胃  
 復傷也用四君子湯或口角流涎或痰氣壅  
 盛脾不能攝也用六君子湯若兒自食甘肥  
 或母食酒麵致兒口舌生瘡用清胃散以清

熱若作嘔少食泄瀉用白朮散以補脾若手  
 足並冷或腹痛惡寒用六君炮薑以溫中若  
 因乳母飲食勞役失宜發熱致兒用補中益  
 氣湯因乳母肝脾二經血虛內熱傳兒用加  
 味逍遙散八珍湯因乳母肝脾鬱怒血傷內  
 熱致兒為患用加味逍遙散加味歸脾湯俱  
 加漏蘆子亦服數滴仍參前弄舌類

直刺不可橫挑恐傷  
 舌絡則言語不清

凡針重  
 舌以針

龜胸龜背者由兒生下風客於脊入於骨髓致  
 成龜背若肺熱脹滿攻於胸膈即成龜胸並用



龜尿點其骨節自愈

取尿法用青蓮葉安龜在上用鏡照之其尿自出

薛按小兒元氣未充腠理不密風邪乘之或痰飲蘊熱於肺風熱交攻而致或坐早風入骨髓治當調補脾肺為主若因乳母厚味辛辣而致者當兼治其母若因稟父肝腎虛熱者用六味地黃丸若稟腎氣不足者用八味地黃丸

若患吐瀉或大便後雖有聲而不能言又能嚙物者非失音此腎怯不能上接於陽也當以地黃丸主之凡口噤不止則失音語遲

薛按前症多因稟腎不足蓋腎脉繫於舌本非地黃丸不能治故患此症者若仰首呵欠則嗽如未應須兼以補中益氣湯滋其化源若陰火上炎肺金受傷而失音者亦治以前法保嬰集云小兒五六歲腎氣不足而不能言者用菖蒲丸口噤不能言者用地黃丸愚治一小兒言遲患泄瀉聲音不亮雜用清熱等劑聲音如啞飲食少思去後多在侵晨朝用地黃丸加五味子夕用補中益氣湯其泄頓止却專服前丸不兩月其言漸亮而愈



一小兒白睛多而黑睛少吐瀉後喉瘖口渴大便不實朝夕悉服地黃丸而痊後患瀉其喉復瘖仍服前丸遂愈

若大病後身目皆黃者黃病也。身痛背強大小便澀一身盡黃小便黃赤此黃疸也瀉者難治。若百日或半年不因病而身黃者胃熱胎疸也若淡黃兼白者胃怯也

薛按大病後身目皆黃或肢體黃胖者脾氣虧損而真臟為病宜用六君子湯參苓白朮散調補元氣病後發渴者脾氣虛而津液少

也用七味白朮散若脾經濕熱壅滯二便秘濇理不得踈泄而為患者名為黃疸用茵陳湯初生身黃壯熱不乳便秘此為胎熱用地黃湯若二便赤濇腹脹面赤飲水用茵陳湯調五苓散若清便自調四肢並冷用益黃散淡黃白用調中丸

愚治一小兒

旬日

兩目發黃漸及遍身用瀉黃散服之瘥

一小兒因母食鬱飽脹嘔酸而患遍身皆黃余以越鞠丸治其母以泄黃散治其子並愈



長大不行行則脚軟。齒久不生則不固。髮久不生則不黑皆胎弱也。

愚按前症即五遲之症也。蓋腎主骨齒者骨之餘髮者腎之榮也。良由父母精血不足腎氣虛弱不能榮養而然耳。有肝腎虛長而不能行者有肝氣虛而手足拳攣者有肝腎虛而脚不能舒展者並用地黃丸滋補之。有心氣虛而不能言語用圓參湯補中益氣湯培養之。若久病或五疳所致者但調補脾胃為主。全嬰方云頭項手足身軟謂之五軟症皆

胎稟腎氣怯弱也。

愚治一小兒

體瘦腿細

不能行步齒不堅固髮稀

短少屬足三陰虛用六味地黃丸補中益氣年餘諸症悉愈形體充實。

一小兒三歲言步未能牙髮稀少體瘦骨立發熱作渴目黑睛少服肥兒丸不應此腎虛疳症也。前丸乃脾胃經之藥久服則腎益虛而疳益甚不信果牙髮漸落用六味丸加鹿茸五味子半載而愈。

一小兒七歲左腿細短寸許不良於行目睛



白多或有盜汗髮黃成穗用地黃丸加鹿茸  
五味子為主佐以補中益氣湯半載行履如  
故

一小兒脫肛半載恪服升補元氣之藥而愈

